

Leta famu ke Pol usuf Timoti Orek famu

Igii e leta famu ke Pol usuf Timoti. Timoti i tina falifuh na Eisia. Tina i nenge fafnan Iudaia ma tama i nenge sikin Grik. Aunbiing Pol i la na fawu e ninla kia, i tafe Timoti ke ka tim pes u isi run la turim isi tel foron foim (Par Aposel 16:1-3). Namih Pol ka luun Timoti isi in parpar kale lotu na Efeses.

Na leta igii, Pol i fas Timoti isi in parpar rokap na lotu koseng foron poropet famfabal, tarama ri ka falaulau unune ken fanu. I fas u sabin ini foron matngan fanu arafah in tim pes ri isi rin kep foim na lotu, ke foron matngan rokap na sinang ae rin mi lo.

Leta famu ke Pol usuf Timoti i aragii:

1:1-2 Tanwaran ususe na leta

1:3-20 Timoti in tikale foron tom fafausum famfambal

2:1-15 Matngan sal una lotu

3:1-16 Foron famfamu na lotu

4:1-16 Timoti in parpar rokap kale u tom isi ik tapiek rokap na tom foim

5:1-6:21 Fafausum usuf Timoti kunan foim kia

¹ Iau Pol, aposel ke Karisito Iesu, na wolwol ke God Tom Fafaliu kirer, ke Karisito Iesu, ae kere kiis nene isi, ini unune.

² Ia sisiit usuf o Timoti, keng kalalik tekentu na unune. Famais, rokap na fofonoi ke siaroh usuf o sing God Tama kerer, ke Kumguui kirer Karisito Iesu.

Timoti in Tikale foron Fafausum Famfabal

³ Igii ia ka farakrakai o sabin isi ok kiis tom aiwa na Efeses, arae ia fas ta o, aunbiing ia la tah una falifuh na Masedonia. On kiis tom aiwa isi ok tikale fanseh ae ri fausum fanu la ini fal e fafausum famfabal. ⁴ Ke ok tikale ri isi gong ri muduung sau ini foron titiipapah foes, ma ini foron ususe na foron mat ken fanu, foron ususe arae, biil ti farfarop lo. I fatapiek fakep ini orek sau, ma biil i fakuum foim ke God. Foim ke God i kuum sau ini unune.

⁵ Ia use rakrakai na orek igii, isi kerek famais faliu ini kerer. Famais ae i la tina balrer ae i fuuh ke tina rokap na wolwol, ke tekentu na unune. ⁶ Isau le fal e fanu ri ka la koseng ta foron rokap na sinang igii, ke ri ka mi sau na foron orek foes. ⁷ Ri ier isi fausum fanu ini foron nagogon ke God, isau le biil ri usum na sanih ae ri use u. Biil sabin ri usum na kamtinan orek ae, ri wol le imel e tasum kiri lo.

⁸ Kere usum le i rokap e foron nagogon ke God, male tikas i foim rokap ini. ⁹ Kere usum sabin le foron nagogon, biil i tapiek usuf foron tom tortores, biil. Foron nagogon i tapiek sau usuf fanu aragii: Foron tom lek nagogon, foron tabun wong, fanu ae biil ri lotu la una aisa God, foron tom tel sinang laulau, fanu ae biil ri mi la na wolwol ke God, fanu ae ri tel sinang la tina piklinbat, foron tom sisiimete, fanu ae ri siimete foron temri ke foron tinri la, ¹⁰ foron tom tel sinangun puur, kaltu ae i fakekel fis tom ini nenge kaltu, fanu ae ri lose fanu la isi nenge kaltu keskes ik fiil pes ri, foron tom famfabal, foron tom falimlim foes, ke fal e sinang sabin. Foron sinang tikii igii i neng keskes na foron fafausum ae i tekentu. ¹¹ Fafausum ae i tekentu ifasih ini Rokap na Fafas. Ma i la tinbae sing God ae i fuun ini fafakalok. Ma Rokap na Fafas ae, i fafas ini memeh ke God. God i unune ufu tah usuf iau isi ian fafas ini.

Fotrokap isi Famais ke God

¹² Ia fotropak usuf Kumguui kirer, Karisito Iesu, ae i ta ta rakrakai usuf iau, wara le i unune lo iau, ke ka tim pes ta iau isi ian tel foim kia. ¹³ Pakanini ia use falaulau Iesu la, ia ka falaulau foron tom unune ke ia ka ta fangungut usuf ri. Isau le famais ke God usuf iau i laumet kanaka, wara le biil ia usum na foron tier ae ia tel u, ke biil biitom ia unune. ¹⁴ Famais tinbae sing Kumguui kirer usuf iau, i laumet kanaka, ma i la usuf iau turim turan sinangun unune ke turan sinangun famais. Fafen igii, i wara sau lo Karisito Iesu.

¹⁵ Orek igii ian use u, i tekentu kanaka ma keren unune lo. Iesu i puh uga na piklinbat isi in faliu pes foron tom tel sinang laulau. Ma ia laulau kanaka lon fanu tikii. ¹⁶ Ma i e wara, God ka finngas famais kia usuf iau, isi Karisito Iesu ik finngas rokap na sinang usuf iau, ae i laumet kanaka, aunbiing i faliu pes ta iau. Ma ia laulau kanaka lon foron tom tel sinang laulau tikii. Pesu, iau arae nenge rokap na tintof usuf fanseh ae rin unune lo Karisito Iesu ma rik kep liu fitliu. ¹⁷ Keren sik asa King ae i liu fitliu, ae biil i met la, ma biil ri par u la, ma i keskes sau i God. Ususefages usuf i biil in to rop. Amen.

¹⁸ Timoti, keng kalalik, rakrakai na orek ae ia ta u usuf o, i arae orek propet ae ri use ta u ulo wo. On sotih rakrakai na foron orek kiri, isi ok fapaket rokap ini Rokap na Fafas. ¹⁹ Sotih rakrakai na unune kiam, ke ok mi na sinang ae o usum le i rokap. Fale fanu biil ri mi lo arae, ke unune kiri ka laulau arae nenge mon ae panaf i pagal u ke ka dom. ²⁰ Ifasih sabin arae Imeneus ru e Aleksenda. Ia ka ta ufu ta ruh una lima Satan, isi ruk kep usum isi biil sabin run use falaulau God.

2

Fafausum na Sinangun Lotu

¹ Tier famu, ia ier isi foron tom unune rin sising. Gamen sising isi sanih gam ier isi, gamen sising isi fanu, ke gamen sising una fotrokap usuf God. Gamen sising arae, isi fanu tikii. ² Ke gamen sising sabin isi foron king, ke isi foron famfamu tikii, isi kerek kiis rokap ini siaroh, ke liu ae i kalkaluu, ke liu ae i mi na wolwol ke God. ³ Male gamen sising arae, ke in rokap kanaka na mata God, Tom Fafaliu kirer, ke in laes ini. ⁴ I ier isi faliu pes fanu tikii, ma isi rik usum na tekentu. ⁵ Wara le i tikii sau e God, ke i tikii sau e kaltu ae i lame turim fanu tura God, i e Karisito Iesu, ⁶ ae i ta ta liu kia tom isi in fiil fafis fanu tikii. Na aunbiing ae God i put ta u, Iesu ka fatekentu wolwol ke God, ae i ier isi faliu pes fanu tikii. ⁷ I e wara, God ka tim pes ta iau isi ian tapiiek nenge aposel, ke iak fafas ini Rokap na Fafas usuf fanu ae biil ri fan Iudaia, ma iak fausum ri ini unune tekentu. Ia orek tekentu, biil ia to lem.

⁸ Ia ier isi fanutamamat tikii na foron maleh rin sising, ma aunbiing rin sising rin sik limri una mawe ini sinang ae i kalkaluu, biil ini balkut ke ini ti fakep ini orek.

⁹ Ia ier sabin le kelefin tikii rin kilkiliis ini foron kilkiliis ken kelefin tom. Rin kilkiliis ini foron kaen ae i finngas bulat ke rokap na sinang. Gong ri got ma ri ka fis olri, gong ri me ri tom ini goul le foron kutkute ae i fen kanaka e matri, ke gong sabin ri kilkiliis ini foron kilkiliis ae i fen kanaka e matri. ¹⁰ Isau le kelefin ae ri tara le ri lotu la usuf God, rin kilkiliis ini foron rokap na sinang.

¹¹ Ke aunbiing kelefin ri kep fafausum, i rokap le rin kiis fofo ma rik fapuh ri tom. ¹² Biil ia to somangat ufu ti fifin isi in fausum ti kaltu, le in famu pes u. I rokap le in kiis fofo sau. ¹³ Wara le God i fakiis famu ta Adam ke namih Iwa. ¹⁴ Ke biil e Adam ae Satan i fabal ta u. Biil. Fifin ae Satan i fabal ta u, ke sinang laulau ka tapiiek. ¹⁵ Isau le God in faliu kelefin na sinangun fafang, male rin tifat na unune, na famais, na sinang kalkaluu ke na tortores na sinang.

3

Foron Famfamu na Lotu

¹ Orek igii i tekentu kanaka, ma keren unune lo: Male tikas i ier isi tapiiek nenge famfamu na lotu, nenge rokap na foim tom ae i tim pes ta u. ² Ke le tikas i ier isi tapiiek nenge famfamu na lotu, i rokap le sinangu in tara aragii: Biil rin tiu u ini ti tier, in tikii sau e antu, wolwol kia in malal, in tikale foron wolwol laulau kia tom, i e matngan kaltu ae fanu ri bulat la lo, in tom somangat pes fanu una matanfel kia, ke i fasih in fausum fanu. ³ Ke biil in tom umin dan rakrakai. Biil in tom ngalngaliaf, in kaltu una siaroh, ke biil in kaltu una fapue, ke biil in lala ier la isi pitkalang. ⁴ I rokap male in nagogon fakasi matanfel kia, ke in fausum berberat kia la isi rin wong la sing i ke rik bulat la lo. ⁵ Male nenge kaltu biil i usum na nagogon fakasi matanfel kia, ke biil i fasih in parpar kale foron tom unune, na lotu ke God. ⁶ Male i am sokiliis liu kia sau, ke biil in tapiiek nenge famfamu, tarama ka falaumet u tom ma ka luut, ke ka tih na nagogon arae Satan. ⁷ I rokap male nenge famfamu na lotu, in matngan kaltu ae fanu biil ri lotu la, rin bulat lo. Male biil, tarama ri ka orek laulau ulo, ke ka fiu na kuun ke Satan.

Foron Tom Falupes na Lotu

⁸ Ifasih sabin usuf foron tom falupes na lotu, i rokap male rin matngan fanu ae i fasih fanu rin bulat lo ri, biil rin kaltu ae iwu la e kerme ri, biil rin fanu una lala umin dan rakrakai, ke biil rin fanu una akalemok. ⁹ Rin posefat na tekentu na unune, ke rin usum tom le wolwol kiri i tortores. ¹⁰ Gamen tof famu ta ri bii, male biil ti tier i tikale ri, ke aimang, gamek somangat ufu ri isi kep foim arae foron tom falupes na lotu.

¹¹ Ifasih sabin usuf foron antu ri, rin matngan kelefin ae i fasih fanu rin bulat lo ri, biil rin orek kumkum la. I rokap le in malal e wolwol kiri, ke rin tekentu na foron foim tikii.

¹² Ke nenge tom falupes na lotu, in tikii sau e antu, ke in nagogon fakasi berberat kia turan fanu tikii ae na fel kia. ¹³ Fanséh ae ri foim rokap arae foron tom falupes na lotu, fanu rin bulat lo ri. Ke unune kiri lo Karisito Iesu in rakrakai lalala.

Waran Unune Kirer

¹⁴ Ia ier isi la sape usuf o, isau le ia wol le, in rokap male ian sisiit famu usuf o. ¹⁵ Male ti tier i tikale iau ma biil ia tapiék sape, o ka usum tah na foron sinang ae fanu ke God rin tel u na fatpoto ri tom. Wara le fanu ke God ae i liu, ri arae nenge rakrakai na tuh na fel, ae i farakrakai orek tekentu. ¹⁶ Tekentu, kere usum tom le, fafausum ae kere unune lo i tier laumet. Pakanini, i kiis mumun tah, isau le igii ka tapiék malal mang. I lame kerer isi unune lo God. Waran fafausum ae i aragii:

Karisito i tapiék aragii kaltu,

ke Tanwa Kalkaluu ka famalal u le, Karisito i tortores na mata God.

Foron angelo ri par ta u,

ma fafas lo ka sararah usuf foron mat tikii,

ke fanu fuun na piklinbat ri ka unune lo.

Ke God ka kep fatatkau u, ma ka fakiis u na memeh kia.

4

Fafanau isi Fafausum Famfambal

¹ Tanwa Kalkaluu i famalal u le, na farfarop na aunbiing, fal e fanu rin ta pokta ri una foron orek tekentu ke God, ma rik mi na foron tanwan famfabal ke na foron fafausum ken foron tanwa laulau. ² Foron fafausum ae, i la sing foron tom famfabal ae biil mang tom i fasih rin iliim sinang

rokap ke sinang laulau, wara le rokap na wolwol kiri ka rop tah, arae i sok tah na yiif. ³ Ri fausum fanu le gong ri fakekel, ke gong ri ien ti fal e matngan inen. Isau le God i fakiis ta foron inen igii isi fanseh ae ri unune ma ri usum na tekentu, rin fotrokap lo, ke namih rik ien u. ⁴ I tekentu kanaka, wara le foron tier tikii ae God i fakiis ta u i rokap. Biil ifasih keren soke ufu ti tier. I rokap le keren somangat pes u ini fotrokap usuf God. ⁵ Wara le orek ke God turan sising, i fakalkaluu foron inen ae, na mata God.

⁶ Male on fausum foron tuamlik na asa Iesu ini foron tier igii, on tapiiek nenge rokap na tom foim ke Karisito Iesu, ke on posefat na tekentu na unune, ke rokap na fafausum ae o ka mi ta lo. ⁷ Fin koseng foron titiipapah foes ke foron ususe ae biil ifasih rin lupes o. Isau le on falasan wo tom isi on mi na foron sinang ae i rokap na mata God. ⁸ Male kere falasan pununfo kerer isi keren filau rokap, ke in farokap kerer sau na fatuklin aunbiing. Isau male keren falasan kerer isi mi na sinang ae i rokap na mata God, ke in farokap kerer na foron tier tikii, in farokap kerer na liu igii, ke na liu sabin ae namih.

⁹ Orek igii ia use u i tekentu kanaka, ma keren unune lo.

¹⁰ Kere foim la ke kere ka totof rakrakai la, wara le kere nene ini unune lo God ae i liu, i e Tom Fafaliu ken fanu tikii. In faliu pes fanu tikii ae ri unune lo.

¹¹ On fausum ri ke ok farakrakai ri ini foron tier igii.

¹² Gong o somangat pes tikas isi in puris o wara le o guam, isau le on tapiiek nenge rokap na tintof na matan foron tom unune na orek kiam, na sinangum, na famais kiam, na unune kiam ke na liu kiam ae i kalkaluu. ¹³ On wes mulmul Buk na Gogoh usuf fanu, ke ok fafas, ke ok fausum ri papang na biing ian tapiiek. ¹⁴ Gong o wol fofoes na fafen ae Tanwa Kalkaluu i ta ta u usuf o, aunbiing foron famfamu na lotu ri luun ta limri na olom, ma ri ka sising, ke ri ka orek poropet tah ulo wo.

¹⁵ On foim rakrakai ke ok ta tikii liu kiam una foron tier igii, isi fanu tikii rik par liu kiam lo God i kuum lalala.

¹⁶ On fofonoi rokap na sinangum ke na fafausum kiam. On posefat na iun tier igii. Male on tel u arae, ke on faliu wo tom turan fanseh sabin ae ri ongen o.

5

Fafanau ulon foron Makos

¹ Aunbiing o ier isi fatortores nenge kaltu ae i pang famu lo wo, gong o orek ngaliaf ulo. On faorek u sau arae i nenge tamam, ke foron guam arae foron tuamlik. ² Ke on fatortores kelefin ae ri pang famu lo wo, arae le ri foron tinam, ke on fatortores foron tah arae le ri foron fenemlik, ini sinang ae i kalkaluu.

³ On lupes foron makos ae biil tom tikas una lupes ri. ⁴ Isau, male nenge makos i mel e berberat kia ke foron tubufifin, ke i rokap le rin finngas famu unune kiri usuf foron fanu lo ri, isi rik kiliis fafis fofonoi ken foron temri ke foron tinri, turan foron tubufifin ri. Wara le matngan sinang arae in falaes God. ⁵ Male nenge makos i kiis keskes tom ma biil tikas una fofonoi lo, i unune ma ka nene isi God sau in lupes u, i sising mulmul la na foron wor ke na foron siat tikii isi God in lupes u. ⁶ Isau le foron makos ae ri ier la sau isi rin falaes pununfo ri, tanwa ri ka met tah aunbiing ri liu biitom. ⁷ Ke, on ta rakrakai na orek igii usuf ri, isi biil tikas in tiu ri ini ti orek. ⁸ Male tikas biil i fofonoi lon foron sikinting tom lo, turan fanu tutus tina matanfel kia, ka la koseng ta tekentu na unune, ma i laulau kanaka lon fanseh ae biil ri unune.

⁹ Gong o siit asan ti makos turan foron makos una kep falupes, male biil biitom i won e sangful e bet kia. On siit asan makos sau ae i tel pes ta i tikii sau e kaltu, ¹⁰ ke ae fanu tikii ri usum na foron rokap na foim kia le i fofonoi rokap na berberat kia, ke i somangat pes foron ses la una

matanfel kia, ke i sufe keken fanu ke God la,* ke i lupes fanu la ae ri fatafe ini tatawin, ke i ta liu kia la tom isi in tel foron rokap na foim.

¹¹ Gong o siit asan foron makos, male biil biitom i won e sangful e bet kiri. Wara le aunbiing wolwol ken pununfo in rakrakai, rik ier mang isi fakekel, ke rik ta pokta ri ulo Karisito. ¹² Aunbiing rin tel u arae, ke rik sotih na nagogon, wara le ri ka lek ta falimlim famu kiri tura Karisito. ¹³ Biil i sau ae, ri famam muduung sau na soleng foron matanfel. Ma nenge tier sabin, ri foron tom orek kumkum ma ri fakau paklu ri la sau na tier ken fal e fanu keskes, ma ri ka use foron tier ae biil i fasih le rin use u. ¹⁴ Pesu ia ka fas foron makos ae ri rakrakai biitom le rin fakekel sabin, rik fafang ma rik fofonoi na matanfel kiri, isi rik tikale foron tuui kirer isi biil rin use falaulau kerer. ¹⁵ Ia use u arae, wara le fal ri ka tamikis tah ma ri ka mi lo Satan.

¹⁶ Male nenge fifin ae i unune ma imel e nenge makos na matanfel kia, i rokap le in lupes u isi gong i ta tatawin usuf foron tom unune, isi i fasih rik lupes foron makos sau ae biil tom tikas una lupes ri.

Fafanau ulon foron Famfamu

¹⁷ Foron famfamu na lotu ae ri tel fakasi foim kiri, i fasih rin fafen fifiil kiri. Ma i tekentu kanaka ulon fanseh ae ri foim rakrakai na fafas ke tel fafausum. ¹⁸ Wara le Buk na Gogoh i tara aragii, “Gong o kabet ngusun bulmakau aunbiing i famam fose ufu punun wit, isi i sabin ik ien.”† Ke nenge orek sabin i tara aragii, “I tortores le seh i foim, in kep fifiil kia.”‡ ¹⁹ Gong o ongen pes orek ken i tikii sau e kaltu, aunbiing i tiu tikas e famfamu. Male in u le in tuul e kaltu rituul tiu u, ke ok somangat isi ongen orek kirituul.

* 5:10: Sinangun fan ludaia i aragii, male foron ses ri tapiiek, ke fafauun in sufe ufu piyiiif tina kekri. † 5:18: Par Lo (Deuteronomy) 25:4 ‡ 5:18: Par Luk 10:7

²⁰ Ke foron famfamu na lotu ae ri tel sinang laulau, gamen fatortores ri na matan fanu tikii, isi fal sabin rik sokeh isi tel sinang laulau.

²¹ Ia ta rakrakai na orek igii usuf o, na mata God ke Karisito Iesu turan foron angelo ae i tim pes ta ri, le on posefat na foron orek igii. Gong o lala nagogon fal, ma fal biil. Ke gong o lala ier sau isi fal, ma fal biil.

²² Gong o luun sape iun limam na olon nenge kaltu isi in tapiiek nenge famfamu. Tarama sinang laulau ken fal e fanu ka tus lo wo. On fofonoi na liu kiam ae i kalkaluu.

²³ Gong o umin dan kanan sau, on umin in tuul sabin e wain, una lupes balam ke una sasem ae o sem u la.

²⁴ Sinang laulau ken fal e fanu i kiis na malmalal, famu na aunbiing ae rin ti na nagogon. Isau le sinang laulau ken fal e fanu ae i kiis mumun tah, namih in tapiiek na malal. ²⁵ Ifasih sau arae foron rokap na sinang. Fale rokap na sinang ka kiis tah na malmalal, ma fal ae biil biitom ri kiis na malmalal, biil tom ifasih le rin kiis mumun.

6

Fafanau ulon foron Fafauun

¹ Fanseh lo gam ae ri foron fafauun, i rokap le rin lala bulat lon foron laulaumet kiri, isi biil tikas in use falaulau asa God turan fafausum kirer. ² Ke foron fafauun sabin ae laulaumet kiri i tom unune, gong ri wol le biil rin bulat lo, wara le ri fatfat latualik na unune. Rin wong rokap sing i, wara le ri foim sing tom unune ae ri ier kanaka isi. Foron tier igii on farakrakai ri ini ke ok fausum ri ini.

Sinangun Ier kanaka isi Pitkalang

³ Male tikas i fausum fanu ini ti fafausum ae i neng keskes na foron fafausum tekentu ke Kumguui kirer, Iesu Karisito, ma i neng keskes sabin na fafausum ae i rokap na mata God, ⁴ matngan kaltu ae, i falaumet u tom ma

biil i usum na ti tier, i ier sau isi in fapue ke ik fakep ini foron orek fofoes, ma sinang ae ka tapiiek arae nenge sasem kia, ma ka fatapieik foron sinang aragii: Sinangun ram, sinangun ngaliaf, fanes, ke wolwol laulau ulon fal. ⁵ Wolwol kiri biil i to malal ma ri fabalkut mulmul fis la tom ini ri, ma foron tekentu na orek ka mangmangal tah sing ri. Ri wol le lotu kiri usuf God in fatapieik in fuun e pitkalang usuf ri.

⁶ Isau le keren kalok male lotu kirer usuf God in la turim turan laes ini foron tier ae God ka ta ta u usuf kerer. ⁷ Wara le aunbiing kere pang tah, biil kere tapiiek tah ini ti tier uga na piklinbat, ke aunbiing sabin keren met, biil ifasih keren kep ufu ti tier tinaga. ⁸ Male imel e inen arer ke kilgiliis kirer, ke ifasih, keren laes sau ini. ⁹ Fansseh ae ri ier kanaka isi in fuun e pitkalang, ri luut la na fatoftof ke ri ka fiu la na kuun ken talos na wolwol ae in falaulau ri, ma in faluut fanu fuun una minet ke fiu fitliu. ¹⁰ Wara le sinangun ier kanaka isi pitkalang, i e waran foron sinang laulau tikii. Ma fanu fuun ae ri wol kanaka la na pitkalang, ri ka la koseng ta tekentu na unune, ma ri ka falaulau fafis liu kiri tom ini foron tatawin.

Pol i Fanau Timoti na Foim kia

¹¹ Isau le o kaltu ke God, on fin koseng foron tier ae, ma on rakrakai isi on mi na foron sinang aragii: tortores na sinang, ma sinang ae i rokap na mata God, sinangun unune, sinangun famais, sinangun sotifat na palgan tatawin, ke sinangun kiis fofu. ¹² On fapaket rokap ini unune, ke ok posefat na liu fitliu ae God i tawi pes ta wo isi on kep u, aunbiing o tel ta rokap na fafapos na matan fanu fuun. ¹³ Ia fas o na mata God ae i ta liu la sing foron tier tikii, ke na mata Karisito Iesu ae i tel ta rokap na fafapos na mata Pontius Pailat. Ia fas o le: ¹⁴ On misuut na foron fafanau ae o ka kep ta u, isi biil rin tiu wo ini ti sinang laulau. Ma on tel u tom arae, papang na

aunbiing ae Kumguui kirer, Iesu Karisito in fis. ¹⁵ Ma in fis na aunbiing tom ae God i put ta u. God ae i fuun ini fafakalok, i keskes sau i Tom Nagogon, i e King ken foron king tikii, ma i e Kumguui ken foron kumguui tikii. ¹⁶ Ma i keskes sau biil i to met la, ma i kiis na falifuh ae ifuun ini malal ae biil tikas i fasih in la fatat u. Biil biitom tikas i par ta u ma biil tikas i fasih in par u. Keren bulat lo, ma rakra kai kia in kiis fitliu. Amen.

¹⁷ On fanau fanseh ae i fuun e minsik kiri aga na piklinbat le, gong ri falaumet ri tom, ke gong ri luun unune kiri na pitkalang ae biil in to kiis dolo. Isau le rin luun unune kiri sau lo God ae i fen kerer la ini foron rokap na tier tikii una falaes kerer. ¹⁸ On fanau ri le rin tel foron rokap na sinang, ke rin fuun ini foron rokap na foim, ke sinangun fafen ke falupes faliu. ¹⁹ Male rin tel u arae, ke rin posefat na minsik tekentu. I e rokap na waran singlen na liu ae namih, isi rik kep u e liu ae i e liu tekentu.

²⁰ Timoti, on fofonoi rokap na foim ae God i unune ufu tah una limam. On fin koseng foron orek fofoes ae biil i fasih rin lupes o isi mi lo God. Ke on fin koseng fanu sabin ae ri fapue la kunan tier ae ri foteng u le tasum, isau le biil e tasum tekentu. ²¹ Fale fanu ri mi ta na foron matngan orek arae, pesu ri ka la koseng tekentu na unune.

Famais ke God usuf gam.

Fanamaket Baibel

Portions of the New Testament in the Tangga Language, also known as the Fanamaket language, of Papua New Guinea

Sampela hap Nupela Testamen long tokples Tangga long Niugini

copyright © 2011-2012 Wycliffe Bible Translators, Inc.

Language: Tangga / Fanamaket (Fanamaket)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

Updates

eBible.org

PDF generated using Haiola and XeLaTeX on 17 Nov 2018 from source files dated 29 Nov 2017

8f38b319-3df0-59e5-9ee5-193b805bbef2